

心法念處經

才七

二百八十九  
篤七

49642



安守法金剛院置

卷輪常轉

三層銀昌

壬午年二月日重脩



正法念處經卷第七

元魏婆羅門瞿曇般若流支譯

篤

地獄品第三之三

又彼比丘知業果報次復觀察合大地獄復  
有何處彼見聞知復有異處彼處名為朱誅  
朱誅是合地獄第八別處殺生偷盜邪行樂

行多作墮合地獄朱誅朱誅衆生何業生於  
彼處彼見聞知若人殺生偷盜邪行樂行多  
作墮合地獄朱誅朱誅地獄處生殺生偷盜  
業及果報如前所說何者邪行所謂有人不  
善觀察若羊若驢以無人女是故姪之彼人  
於佛不生敬重或在浮屠或近浮屠彼人以





是惡業因緣身壞命終墮於惡處合大地獄  
朱誅朱誅地獄處生受大苦惱所謂鐵蟻常  
所喫食一切身分受大苦惱彼地獄火滿其  
腹內彼地獄人內外燒煮自種惡業得此惡  
報如是無量百千年歲常有惡蟲朱誅朱誅  
在地獄中噉食其肉復飲其血既飲血已次  
斷其筋既斷筋已次破其骨既破骨已次飲  
其髓既飲髓已食大小腸彼地獄人如是燒  
已如是炙已如是食已唱喚號哭種種浪語  
悲號大哭如是乃至不可愛樂不善惡業食  
受未盡如是無量百千年歲常被燒煮炙熟  
食之乃至惡業未壞未爛業氣未盡於一切



時與苦不止若惡業盡彼地獄處來乃得  
若於前世過去久遠有善業熟不生餓鬼畜  
生之道若生人中同業之處多有怨對雖在  
王舍而不得力生常貧窮資生乏少又不長  
命是彼邪行惡業勢力在於人中受餘殘果  
又彼比丘知業果報次復觀察合大地獄復

有何處彼見聞知復有異處名何何奚是合  
地獄第九別處是何業報作集之業普遍究  
竟墮合地獄何何奚處彼見聞知若人殺生  
偷盜邪行樂行多作墮合地獄何何奚處殺  
生偷盜業及果報如前所說何者邪行邊地  
夷人於姊妹等不應行處而行姪欲彼國法

余生處過惡彼人以是惡業因緣身壞命終  
生合地獄何何奚處受大苦惱所謂彼處地  
獄之中常被燒煮閻魔羅人之所撾打苦毒  
吼喚其聲遍滿五千由旬彼地獄人未到地  
獄在中有中聞彼吼聲吼聲極惡不可得聞  
彼顛倒故聞彼啼哭則是歌聲拍手等聲種  
種甜聲惡業力故聞之愛樂生如是心令我  
到彼如是聲處如是念已速生彼處何因緣  
有取因緣有彼中有中何處何處發心希取  
則生彼彼心取彼已則生彼處既生彼處即  
於生時得地獄苦即聞地獄自體惡聲急惡  
苦惱無異相似不可譬喻受大苦惱既聞惡



聲心重破壞受大苦惱所謂鐵山名烏丘  
其山炎然其炎極高五千由旬在虛空界彼  
有鐵樹樹有鐵烏烏身炎然滿彼樹上彼山  
火然間無空處惡業力故常有炎火熾然不  
滅以惡業故見蓮華林遍滿彼山彼地獄人  
既見蓮華迭互相喚作如是言汝來汝來如  
是山上多有冷林潤膩之林今可共往閻魔  
羅人打地獄人上雨刀石罪人畏故走赴彼  
山望得救勉望主望歸如是罪人既到彼山  
而彼山上熱炎遍滿多有炎烏鐵嘴甚利彼  
地獄人如是見已彼烏疾來向地獄人彼地  
獄人有炎烏來破其頭者復有烏來取其腦

者復有烏來取其眼者復有烏來取其鼻者  
復有烏來取其頰者復有烏來取其皮者復  
有烏來取其脇者復有烏來取其足者復有  
烏來取其舌者復有烏來取其項者復有烏  
來取頭皮者復有烏來取其喉者復有烏來  
取其心者復有烏來取其肺者復有烏來取  
小大腸復有烏來取其腹皮復有烏來取其  
臍下陰密處者復有烏來取其脛者復有烏  
來取其膂者復有烏來取足跟皮復有烏來  
取足下皮復有烏來取其足指復有烏來分  
分食之復有烏來分分取肋復有烏來取脇  
骨者復有烏來唯取其手左相之骨復有烏



來一切身分具足取者復有鳥來取其髓者  
如是衆鳥食地獄人分分皆食罪業力故食  
已還生於彼炎鳥閻魔羅人生怖畏故烏丘  
山中處處馳走望救望歸上烏丘山上彼山  
已以惡業故炎火遍滿來覆其身如是無量  
百千年歲燒而復生是彼作集惡業力故受  
大苦惱若復上到烏丘山頂山頭復有火炎  
極高五千由旬彼炎吹舉在空而燒如燒飛  
蟲如是無量百千年歲受大苦惱而常不死  
乃至惡業未壞未爛業氣未盡於一切時與  
苦不止若彼殺生偷盜邪行樂行多作惡業  
受盡彼地獄處尔乃得脫若於前世過去久

遠有善業熟不生餓鬼畜生之道若生人中  
同業之處一切身分皆悉爛臭得惡癩病若  
得癡病多有怨對恒常貧窮生惡國土彼作  
集業餘殘果報

又彼比丘知業果報次復觀察合大地獄復  
有何處彼見聞知復有異處名淚火出是合

地獄第十別處衆生何業生於彼處彼見有  
人殺盜邪行樂行多作墮合地獄淚火出處  
殺生偷盜業及果報如前所說何者邪行若  
比丘尼先共餘人行不淨行毀破禁戒若人  
重犯彼比丘尼彼人以是惡業因緣身壞命  
終墮於惡處合大地獄淚火出處受大苦惱



所謂彼處相似受苦彼苦堅韌不愛業作所謂大火普炎所燒眼出火淚彼淚是火即燒其身彼地獄人受如是等種種苦惱又復更受餘諸苦惱閻魔羅人擗其眼眶佉羅炭置眼令滿劈其眼骨猶如劈竹彼地獄處如是惡畏復以鐵鉤鐵杵鐵枷鉤割打築令身分散以熱鐵鉗擗其糞門洋熱白蠟內之令滿如是內燒復有大火外燒其身內外二種如是極燒受第一苦急惡苦惱受如是等無量種種衆苦具足閻魔羅人說偈言

內滿熱白蠟

外以大火燒

極燒受大苦

地獄惡業人

若業生苦果

受惡苦惱報

彼於三界中

不可得譬喻

三種業三果

於三界中生

三過三心起

三處苦報熟

彼如是業報

於三界中生

因緣和合作

如是異法起

如心如是行

如是如是轉

善人行善行

惡人造惡業

心自在作業

業自在復有

此心業所起

如是愛所誑

惡心作惡業

彼人來至此

若在地獄煮

彼人愛所誑

非異人作惡

異人受苦報

自業自得果

衆生皆如是

汝自心所作

一切如是誑

今為大火燒

何故尔呻喚

閻魔羅人如是責疏地獄人言汝自作業今

者自受不可得脫如是一切業果所縛彼一



切業此中受報閻魔羅人如是責之彼地獄人閻魔羅人如是無量百千年中如是燒煮地獄罪人乃至作集惡不善業未壞未爛業氣未盡於一切時與苦不止若惡業盡彼地獄處尔乃得脫若於前世過去久遠有善業熟不生餓鬼畜生之道若生人中同業之處常有癖病在其腹中若身焦枯形貌醜陋若守門戶身體狀貌如燒樹林作集業力餘殘果報

又彼比丘知業果報次復觀察合大地獄復有何處彼見聞知復有異處彼處名為一切根滅是合地獄第十一處衆生何業生於彼

處彼見有人殺盜邪行樂行多作墮合地獄  
一切根滅地獄處生殺生偷盜業及果報如  
前所說今說邪行樂行多作若人多欲或於  
口中若糞門中非婦女根姪彼婦女彼人以  
是惡業因緣身壞命終墮於惡處合大地獄  
一切根滅別異處生受大苦惱所謂以火置  
口令滿以熱鐵鉢盛赤銅汁鐵叉擗口打刺  
令寬置熱銅汁彼處復有熱鐵黑虫蟲體炎  
然彼十一處皆悉火然以爲炎虜在中燒之  
雖燒猶活如是常燒熱炎鐵蟻啞食其眼熱  
白蠟汁置耳令滿炎熱利刀割截其鼻復以  
利刀次割其舌兩熱利刀燒割其身一切諸



根受大苦惱受極苦惱得不樂報彼地獄人  
無異相似不可譬類今說少分譬如以燈取  
況於日如是地獄受苦亦令非有比類天上  
樂勝亦無譬喻彼地獄人受地獄苦亦復如  
是無有譬喻何以故天上樂勝地獄苦重如  
是苦樂今說少分彼地獄處所受苦惱堅鞭

尤重乃至作集惡不善業未壞未爛業氣未  
盡於一切時與苦不止若惡業盡彼地獄處  
亦乃得脫若於前世過去久遠有善業熟不  
生餓鬼畜生之道若生人中同業之處妻不  
貞良他人共通喚謀他人而共殺之若告官  
人誣枉令殺若以惡毒和藥而殺若待其睡

以刀等殺是彼作集惡業勢力餘殘果報作  
集業力果報未盡不可得脫會必受之

又彼比丘知業果報次復觀察合大地獄復  
有何處彼見聞知復有異處名無彼岸受苦  
惱處是合地獄第十二處衆生何業生於彼  
處彼見有人殺盜邪行樂行多作墮合地獄  
生無彼岸受苦惱處殺生偷盜業及果報如  
前所說何者邪行所謂有人起婬欲心憶念  
自妻姪他婦女彼人以是惡業因緣身壞命  
終墮於惡處合大地獄生死彼岸受苦惱處  
受大苦惱作集業力受如是苦所謂彼處受  
火燒苦受刀割苦受熱灰苦受諸病苦如是



彼岸則不可得無安慰者如是所說受諸苦  
惱不可譬喻如說受苦彼地獄人自心所誑  
如是受苦如是無量百千年中常被燒炙若  
煮若打乃至集作惡不善業未壞未爛業氣  
未盡於一切時與苦不止若惡業盡彼地獄  
處亦乃得脫若於前世過去久遠有善業熟  
不生餓鬼畜生之道若生人中同業之處則  
常貧窮廣野惡處山中嶮處為夷人奴常有  
病苦

又彼比丘知業果報次復觀察合大地獄復  
有何處彼見聞知復有異處名鉢頭摩是合  
地獄第十三處衆生何業生於彼處彼見有

人殺生偷盜邪行作集墮合地獄鉢頭摩處  
殺生偷盜業及果報如前所說何者邪行所  
謂沙門自知沙門本在俗時先共婦女曾行  
欲來得欲滋味雖爲比丘心猶憶念夜卧夢  
中見彼婦女於姪欲味不善觀察即共行欲  
彼人覺已心即味著非梵行事思量憶念心  
生隨喜向他讚說姪欲功德喜笑心樂樂行  
多作彼彼喜樂彼人以是惡業因緣身壞命  
終墮於惡處合大地獄鉢頭摩處受大苦惱  
所謂苦者彼地獄處一切皆作鉢頭摩色與  
鉢頭摩色相相似彼處如是普皆赤色有赤  
光明閻魔羅人取地獄人鑊中煮之若置鐵



函鐵杵搗之若脫彼處彼人遠見鉢頭摩華  
在青池中彼地獄人若於函鑊二苦得脫於  
彼青池鉢頭摩華望救望歸疾走往赴生如  
是心我往彼處應得安樂彼地獄人飢渴苦  
惱望鉢頭摩彼人如是若百過走若干過走  
所走之道多饒鐵鉤傷破其足既破足已敷  
心在地彼地鐵鉤傷破其心若背著地鐵鉤  
破背若傍著地鐵鉤破脇若其坐者鐵鉤上  
入彼人如是迭相唱喚若燒若煮飢渴身乾  
迭相唱喚號哭懊惱一切罪人如是齊心看  
鉢頭摩閻魔羅人在其背後執大利刀若斧  
若枷割斫打之彼地獄人種種方便求救求

歸到鉢頭摩到已即上望涼冷故彼鉢頭摩  
如佉陀羅大火遍滿金剛堅葉罪人既上樹  
葉鉤卷彼惡業人以惡業故在合地獄鉢頭  
摩處如是無量百千億歲以惡業故煮而不  
死乃至作集惡不善業未壞未爛業氣未盡  
於一切時與苦不止若惡業盡彼地獄處亦  
乃得脫若於前世過去久遠有善業熟不生  
餓鬼畜生之道若生人中同業之處彼人則  
得雄雌等眼看視不正無戒貧窮壽命短促  
作集業力之所致也

又彼比丘知業果報次復觀察合大地獄復  
有何處彼見聞知復有異處名為摩訶鉢頭



摩處是合地獄第十四處衆生何業生於彼  
處彼見有人殺盜邪行樂行多作墮合地獄  
生於摩訶鉢頭摩處殺生偷盜業及果報如  
前所說何者邪行實非沙門自謂沙門而戒  
有缺何以故雖行梵行不求涅槃如貝聲行  
笑涅槃行如是念言我此梵行願生天中若  
生餘處天相似處令我生彼天世界中天女  
衆中如是沙門如是梵行非梵行願乃是愛  
行生死因行愛因緣行是垢染行如是梵行  
於病老死憂悲啼哭椎胸拍頭尤苦懊惱如  
是等惡不得解脫彼人以是惡業因緣身壞  
命終墮於惡處合大地獄大鉢頭摩地獄處

生受大苦惱所謂有河名曰灰河廣五由旬  
長百由旬常流不息無針孔處灰不遍滿彼  
地獄人在彼河中受極堅鞭第一苦惱既墮  
彼河身則分散骨則為石髮為水衣肉則為  
泥河中水者熱白鑷汁地獄罪人身散還合  
為河中魚彼河所漂漂已則熟右指左指有  
炎業鳥而噉食之若望歸救走離彼河閻魔  
羅人以鐵炎擗擗置河中彼若欲出足則爛  
熟筋熟脰熟膈熟寬熟寬骨亦熟寬皮亦熟  
寬肉亦熟背肉墮落背肉亦熟頭肉墮落頭  
肉亦熟頭骨墮落頭骨亦熟髑髏墮落髑髏  
亦熟彼地獄人如是河中如是如是燒煮炙



等如是無量百千年歲彼地獄人彼惡河中  
受極苦惱尔乃得脫雖脫彼處而復更見有  
清陂池池有開敷鉢頭摩華彼地獄人望救  
望歸求安隱樂走向彼處鉢頭摩林彼鐵蓮  
華觸如利刀彼地獄人身若觸之彼鐵蓮華  
削割斬斫身體碎破稍墮漸落閻魔羅人多  
與苦惱逼令速上蓮華林上彼蓮華林滿中  
熾火其華鐵葉罪人既上葉則卷合彼地獄  
人在其葉內熾火燒然如是無量百千年歲  
以惡業故彼中有烏而食其眼拔其舌根割  
截其耳分散其身如是烏者自業果報彼地  
獄人於彼摩訶鉢頭摩處地獄之中常被燒

煮乃至作集惡不善業未壞未爛業氣未盡  
於一切時與苦不止若惡業盡彼地獄處亦  
乃得脫若於前世過去久遠有善業熟不生  
餓鬼畜生之道若生人中同業之處則患疥  
病常飢常渴復多瞋恚是彼惡業餘殘果報  
又彼比丘知業果報次復觀察合大地獄復  
有何處彼見聞知復有異處名火盆處是合  
地獄第十五處衆生何業生於彼處彼見有  
人殺盜邪行樂行多作墮合地獄生火盆處  
殺生偷盜業及果報如前所說何者邪行實  
非沙門自謂沙門作沙門已憶念在家白衣  
身時習近婦女喜笑舞戲彼人如是不善觀



察憶念喜樂心生分別數數如是思惟分別  
非善思惟非是正念證法思惟非滅苦集正  
法思惟非學思惟於學思惟不作不行非正  
憶念調心思惟非念佛法衆僧思惟非念死  
想非於生死離欲思惟非見少罪如微塵許  
怖畏思惟不應多取敷具醫藥看病飲食資

具因緣彼如是人而便多取敷具醫藥隨病  
飲食資具因緣彼人如是多取卧具病藥飲  
食資具因緣彼人以是惡業因緣身壞命終  
墮於惡趣合大地獄生火盆處受大苦惱所  
謂苦者彼火盆處熱炎遍滿無毛頭處無炎  
無熱而不遍者彼地獄處地獄人身狀如燈

樹彼燈熱炎合爲一炎彼地獄人呻號吼喚  
吼喚口開滿口熱炎彼地獄人極受大苦轉  
復唱喚呻號啼哭火炎入耳旣入耳故轉復  
呻號唱聲吼喚炎復入眼旣入眼故轉復呻  
號唱聲吼喚彼人如是普身炎然熱炎鐵衣  
復燒其舌旣破戒已食他飲食故燒其舌以  
犯禁戒不善觀察看他婦女故燒其眼以不  
護戒共他婦女歌笑相喚以愛染心聽其聲  
故熱白鑷汁滿其耳中以犯禁戒取僧香熏  
故割其鼻以火燒之彼人如是五根犯戒墮  
地獄中本業相似受苦果報惡業行故彼地  
獄中如是無量百千年歲常被燒煮多有炎



鬚處處普遍滿合地獄名火盆處乃至集作  
惡不善業未壞未爛業氣未盡於一切時與  
苦不止若惡業盡彼地獄處亦乃得脫若於  
前世過去久遠有善業熟不生餓鬼畜生之  
道若生人中同業之處得獨儒身目盲耳聾  
貧窮少死常患飢渴是彼惡業餘殘果報  
又彼比丘知業果報次復觀察合大地獄復  
有何處彼見聞知復有異處彼處名爲鐵末  
火處是合地獄第十六處衆生何業生於彼  
處彼見聞知若人殺生偷盜邪行樂行多作  
墮合地獄鐵末火處殺生偷盜業及果報如  
前所說何者邪行所謂有人實非沙門自謂

沙門若聞婦女歌舞戲笑莊嚴具聲既聞聲  
已不善觀察心生愛染聞彼歌笑舞戲等聲  
漏失不淨心適味著彼人以是惡業因緣身  
壞命終墮於惡處合大地獄鐵末火處受大  
苦惱所謂熱鐵四角地獄周圍鐵壁五百由  
旬常有鐵火熾然不息燒地獄人自業所作  
從上雨火不曾暫停如是雨鐵如是雨火以  
雨鐵故彼地獄人一切身分分散爲末以雨  
火故常煮常燒常受如是二種雨苦彼地獄  
人如是受苦唯地獄人受如是苦除是以外  
無可譬喻彼人如是所受苦惱堅鞮急惡如  
是惡苦一切皆畏不愛不樂自業所作如是



受苦乃至作集惡不善業未壞未爛業氣未盡於一切時與苦不止若惡業盡彼地獄處亦乃得脫若於前世過去久遠有善業熟不生餓鬼畜生之道若生人中同業之處常在大河渡人之處常生怖畏若身常病若當爲等雖有惡命而常畏死是彼惡業餘殘果報又彼比丘觀察如是合大地獄一一別處唯十六處更不見有第十七處合大地獄十六別處多衆常滿如是觀察實業法報彼比丘如是觀察彼諸衆生種種惡業自在果報厭離生死

又修行者內心思惟隨順正法觀察法行如

此比丘諦觀察已通達業果如是諦知三大  
地獄并別處所及業果報觀察知已攀緣通  
達不樂在中住魔境界彼地夜又見彼比丘  
如是精進即復上聞虛空夜又虛空夜又聞  
四大王如前所說次第乃至無量光天乃至  
說言閻浮提中某國某村如是次第剷除鬚

髮被服法衣正信出家彼比丘如是乃至得  
第九地無量光天聞已歡喜迭相告言天等  
當知魔分損減正法則長

又彼比丘如是觀察三地獄已次復觀察第  
四叫喚之大地獄衆生何業生於彼中彼見  
聞知所謂有人殺生偷盜邪行飲酒樂行多



作如是四業普遍究竟作而復集身壞命終  
則生如是叫喚大地獄殺盜邪行業及果報  
如前所說今說飲酒樂行多作則生叫喚大  
地獄中若人以酒與會僧衆若與戒人出家  
比丘若寂靜人寂滅心人禪定樂者與其酒  
故心則濁亂彼人以是惡業因緣身壞命終  
墮於惡處叫喚大地獄彼中惡熱受大苦惱  
受何等苦謂以鐵鉗強擘其口洋赤銅汁灌  
口令飲初燒其脣旣燒脣已次燒其斷旣燒  
斷已次燒其舌旣燒舌已次燒其咽如是燒  
咽次燒其肚如是次第燒其小腸燒小腸已  
復燒大腸如是生藏次燒熟藏燒熟藏已從

下而出如是彼人酒不善業得如是報號啼  
乳喚呼嗟大哭彼人如是唱喚吼已閻魔羅  
人爲嘖䟽之而說偈言

已作不善業

今受苦惱果

自癡心所作

後則被燒煮

如是不善業

已惡心所作

今受莫呻喚

何用呼嗟爲

若人作惡業

皆得惡果報

若欲自樂者

如是莫近惡

若作少惡業

地獄多受苦

癡心自在故

得脫猶作惡

惡業不可信

令人到地獄

少火能燒山

及一切林樹

癡人念作惡

不喜樂善法

見惡行果報

皆從因緣生

云何不樂法

何故不捨惡

若人離惡業



則不見地獄

若人自心癡

不知惡業果

彼人受此惡

汝今如是受

惡業生地獄

為惡業所燒

惡不到涅槃

然不過惡業

本惡業所誑

今為惡業燒

若不作惡業

終不受苦惱

若人能制愛

此道寂靜勝

如是捨愛人

則近涅槃住

已造惡業竟

不曾修行善

如是惡業燒

心勿行惡業

行惡業之人

無處得安樂

若欲自樂者

應當喜樂法

若人喜樂惡

受苦中之苦

若不能忍苦

不應作惡業

善人行善易

惡人行善難

惡人造惡易

善人作惡難

彼地獄中閻魔羅人如是噴䟽地獄人已設

種種苦所謂二山山甚堅鞭鐵炎火然兩箱  
作勢一時俱來攢地獄人攢已磨之其身散  
盡無物可見如是磨已而復還生復以二山  
如前攢磨如是如是生已復攢生已復磨如  
是無量百千年歲惡業未盡彼地獄處若得  
脫已走向餘處望救望歸思得解脫閻魔羅  
人即復執之今頭在下置鐵鑊中彼人如是  
在鐵鑊中頭面在下經百千年湯火煮之如  
是惡業猶故不盡彼鑊湯處若得脫已走向  
餘處望救望歸欲求安樂彼人面前有大鐵  
烏其身炎然即執其身攔斷分散脉脉節節  
為百千分分散食之分分分散如是無量百



千年歲而彼惡業猶故不盡彼鐵鳥處若得  
脫已望救望歸走向餘處飢渴苦惱遠見清  
水若陂池等疾走往赴彼處唯有熱白鑷汁  
滿彼池等彼欲凜洗即便入中既入彼處以  
惡業故即有大龜取而沉之熱白鑷汁煮令  
極熟如是無量百千年歲乃至不善惡業破  
壞無氣盡已如是大龜尔乃放之既得脫已  
彼人苦惱望救望歸走向餘處面前現見閻  
魔羅人手執鐵擲其擲炎然以如是擲而擲  
其頭即便穿徹或有被刺破背出者或有被  
刺破脇出者或有被刺破頭出者彼地獄人  
受大苦惱唱聲吼喚餘地獄人罪業力故聞

其吼喚謂是歌聲皆共走趣望救望歸閻魔  
羅人即復執之鐵攔刀斧皆悉炎然穿刺割  
斫如是無量百千年歲乃至作集惡業破壞  
無氣爛盡彼地獄處尔乃得脫望救望歸走  
向餘處遠見有村屋舍具足多有河池專心  
直進疾走往赴欲入彼村彼村一切皆悉炎  
然有金剛口利牙黑蟲身皆炎然處處遍滿  
既入村已門即密閉彼地獄人爲金剛口利  
牙黑蟲之所噉食如是無量百千年歲乃至  
作集惡業破壞無氣爛盡得脫如是苦惱大  
海若於前世過去久遠有善業熟不生餓鬼  
畜生之道若生人中同業之處心則忽忘貧



窮無物常在道巷四出巷中賣鄙惡物治生  
求利為諸小兒詳笑戲弄口齒惡色脚足擘  
烈常患飢渴之所逼切無有妻子無父無母  
兄弟姊妹此是飲酒與酒惡業餘殘果報如  
是戒人與酒罪業則墮如是叫喚大地獄受  
苦果報應如是知

又彼此丘知業果報復觀叫喚之大地獄有  
何別處彼見聞知叫喚地獄有別異處名大  
吼處衆生何業生於彼處彼見有人殺生偷  
盜邪行飲酒樂行多作墮彼地獄生大吼處  
殺盜邪行業及果報如前所說何者飲酒所  
謂以酒與齋戒人清淨之人彼人以是惡業

因緣身壞命終墮於惡處叫喚地獄犬吼處  
生受大苦惱所謂苦者熱白蠟汁先置口中  
以本持酒與齋戒人與清淨人惡業所致故  
以炎然鐵鉢盛之置其口中大苦逼惱發聲  
大吼如是吼聲餘地獄中則不如是彼諸罪  
人生大悲苦唱聲吼喚大吼之聲遍滿虛空  
閻魔羅人本性自瞋彼地獄人罪業力故閻  
魔羅人聞其吼聲倍更瞋怒諸飲酒人不護  
諸惡一切不善不生慙愧若與酒者是則與  
人一切不善以飲酒故心不專正不護善法  
心則錯亂彼亂心人不識好惡一切不善不  
生慚愧若人與酒則與其因以有因故能為



不善如相似因相似得果以此因緣久受大  
苦種種苦惱無量苦惱何故名曰大吼地獄  
以受無量種種苦惱發聲大吼是故名曰大  
吼地獄如是衆生在如是處乃至不善惡業  
破壞無氣爛盡彼地獄處亦乃得脫若於前  
世過去久遠有善業熟不生餓鬼畜生之道  
若生人中同業之處生則愚鈍心不點慧則  
多忘失少時不憶如是闇鈍愚癡之人無有  
資財人不敬愛貧窮無物雖復求財而不可  
得若得微病即便命終是彼惡業餘殘果報  
又彼比丘知業果報復觀叫喚之大地獄復  
有何處彼見如是叫喚地獄有十六處何等

十六一名大吼二名普聲三名髮火流四名  
火末垂五名熱鐵火杵六名雨炎火石七名  
殺殺八名鐵林曠野九名普聞十名閻魔羅  
遮約曠野十一名劍林十二名大劍林十三  
名芭蕉烟林十四名有煙火林十五名火雲  
霧十六名分別苦此十六處叫喚地獄所有

別處衆生何業報生彼處彼比丘如是已觀  
叫喚地獄大吼處已次觀第二名普聲處彼  
見有人殺生偷盜邪行飲酒樂行多作彼人  
則墮叫喚地獄生普聲處殺盜邪行業及果  
報如前所說何者飲酒若人飲酒樂行多作  
若於他人初受戒者與酒令飲彼人以是惡



業因緣身壞命終墮於惡處叫喚地獄普聲  
處生受大苦惱所謂杵築彼地獄人發聲吼  
喚其聲遍滿彼地獄處若鐵圍山一切諸河  
四天下處閻浮提等在彼處者彼吼聲出一  
切消盡彼人啼哭悲號吼聲自業相似彼地  
獄人如是吼喚乃至惡業未壞未爛業氣未  
盡於一切時與苦不止若惡業盡彼地獄處  
尔乃得脫若於前世過去久遠有善業熟不  
生餓鬼畜生之道若生人中同業之處則生  
曠野少水國土  
又彼此丘知業果報復觀叫喚之大地獄復  
有何處彼見聞知叫喚大地獄復有異處名

煖火流是彼地獄第三別處衆生何業生於  
彼處彼見有人殺生偷盜邪行飲酒樂行多  
作彼人則墮叫喚地獄煖火流處殺盜邪行  
業及果報如前所說何者飲酒於優婆塞五  
戒人邊說酒功德作如是言酒亦是戒令其  
飲酒彼人以是惡業因緣身壞命終墮於惡  
處叫喚地獄煖火流處受大苦惱所謂兩火  
彼地獄人常被燒煮炎然頭煖乃至脚足有  
熱鐵狗噉食其足炎策鐵鷲破其髑髏而飲  
其腦熱鐵野干食其身中如是常燒如是常  
食彼人自作不善惡業非心苦號哭說偈傷恨  
向閻羅人而作是言



汝何無悲心  
於我何無悲

復何不寂靜

我是悲心器

閻魔羅人答罪人曰

汝為癡所覆

自作多惡業

今受極重苦

非我造此因

癡人不學戒

作集多惡業

既有多惡業

今得如是果

是汝之所作

非是我因緣

若人作惡業

彼業則是因

已為愛翳誑

作惡不善業

今受惡業報

何故瞋恨我

不作不受殃

非謂惡無因

若人意作惡

彼人則自受

莫喜樂飲酒

酒為毒中毒

常喜樂飲酒

能殺害善法

若常樂飲酒

彼人非正意

意動法即得

故應常捨酒

酒為失中失

是智者所說

如是莫樂酒

自失令他失

常喜樂飲酒

得不愛惡法

如是得言惡

故應捨飲酒

財盡人中鄙

第一懈怠本

飲酒則有過

如是應捨酒

酒能熾然欲

瞋心亦如是

癡亦因酒盛

是故應捨酒

如是地獄髮火流處是地獄人自業所得乃

至作集惡業破壞無氣爛盡彼地獄處亦乃

得脫若於前世過去久遠有善業熟不生餓

鬼畜生之道若生人中同業之處彼人則生

一種國土無酒之處一切資具無色無味不

知色味是本惡業餘殘果報



正法念處經卷第七

篤

脍蒲米 踰時軟反 堅鞞下正作 鞞吾更反 鞭 擗其正上

作擘補 眼莛下正作 癖病亦必 貌貌自 搗擣

音島 椎膏上直 標七乱反 寬熟上正作 貌貌自 搗擣

疾病式類反 鬚鬚莫班反 獨音蜀玉篇 斷

語斤 攢地嗟上就 愚鈍下徒



